

Memuliakan Tetamu

Daripada Abi Syuraih, Khuwailid bin Amru al-Khuzai RA berkata, aku mendengar Rasulullah SAW bersabda:

مَنْ كَانَ يُؤْمِنُ بِاللَّهِ وَالْيَوْمِ الْآخِرِ فَلْيُكْرِمْ ضَيْفَهُ جَائِزَتَهُ. قَالُوا: وَمَا جَائِزَتُهُ يَا رَسُولَ اللَّهِ؟ قَالَ: يَوْمُهُ وَلَيْلَتُهُ. وَضَيْفُهُ ثَلَاثَةُ أَيَّامٍ، فَمَا كَانَ وَرَاءَ ذَلِكَ فَهُوَ صَدَقَهُ عَلَيْهِ.

Maksudnya: “Siapa yang beriman dengan Allah SWT dan hari Akhirat, maka hendaklah dia memuliakan tetamunya dan jaizahnya. Mereka bertanya: Apakah jaizahnya hai Rasulullah? Sabda Rasulullah SAW: Layanan sehari semalam dan hak tetamu tiga hari. Maka selepas daripada itu hanyalah sedekah ke atasnya.”

Riwayat al-Bukhari di dalam *al-Sahih*, Kitab *al-Adab* (6135) dan Muslim di dalam Kitab *Luqatah* (14)

Pedoman dan Iktibar Hadis

Antaranya:

1. Memuliakan tetamu dengan menyediakan makanan dan minuman menurut kadar kemampuan dan layanan yang baik seperti memberi tempat duduk yang sepatutnya dan menghantar pulang ke pintu lebih lagi di perkarangan. Inilah sifat melayan tetamu kerana kedatangan tetamu boleh membawa kebaikan kepada seseorang.
2. Seorang ulama terkemuka iaitu al-Laith bin Saad berpendapat: “Penerimaan

tetamu dan memuliakannya adalah wajib selama masa satu malam. Tetapi mereka (para ulama) telah berbeza pendapat tentang apakah penerimaan tetamu itu diwajibkan atas orang kota dan orang kampung atau hanya di atas orang kampung sahaja?"

3. Imam al-Syafie berpendapat bahawa penerimaan itu diwajibkan atas orang kota dan orang kampung."
4. Imam Malik pula berpendapat bahawa penerimaan tersebut hanya atas orang-orang kampung. Ini kerana orang-orang musafir di dalam kota atau pekan biasanya senang mendapat kemudahan dalam perkara tempat penginapan atau persinggahan, juga dalam urusan membeli makanan dan lainnya.
5. Sementara itu, Qadi Iyadh berpendapat bahawa *dhiyafah* itu wajib dilakukan terhadap seorang musafir yang perlukan kepada suatu dan keadaannya di dalam kesusahan.
6. Dalam masyarakat Melayu, budaya menerima tetamu amat baik seperti menjamu dan melayannya dengan mesra, tetapi alangkah baiknya apabila ditingkatkan lagi seperti mana yang dianjurkan oleh Islam.

Mutiara Hikmah

7. **Ibn Abbas R.Anhuma berkata:** Tiga jenis akhlak pada zaman jahiliyah yang baik, yang digalakkan kepada kaum muslimin untuk meneruskannya:
 - Jika tetamu datang berkunjung nescaya dia bersungguh-sungguh menghormati dan menjamunya.
 - Jika isteri sudah tua, nescaya tidak menceraikannya.
 - Jika jiran tetangganya mendapat kesukaran nescaya menolongnya termasuk membayar hutang.
8. **Pujangga berkata:** Menghias diri dengan meneliti secara saksama, tidak memotong percakapan, lembut dalam bertutur dan halus budi bahasa adalah lencana-lencana yang tersemat di dada orang-orang yang merdeka.

Kisah Teladan

Diriwayatkan oleh al-Ahnaf bin Qais bahawa pada suatu hari, sedang Qais bin Ashim duduk hendak makan dan di sampingnya ada anak yang kecil, maka datanglah jariahnya membawa makanan, yang antaranya daging bakar yang masih lekat pada cangkuknya, yang baru dibawa dari atas api.

Lantaran daging itu terlalu panas maka terlepaslah cangkuk itu dari tangan jariahnya tadi, lalu jatuh pula ke atas anak kecil yang berdosa itu, menembusi dadanya dan dengan serta-merta anak kecil itu mati. Jariyah terkejut dan berubah sekali warna mukanya dan terus terpacul dari mulutnya: Saya tidak sengaja! Tidak mengapa! Balas Qais bin Ashim. Engkau kumerdekakan kerana Allah.

Dengan sebab kematian anak kecilnya dan supaya dia tidak menyimpan marah terhadap jariah tersebut ketika melihatnya nanti, maka Qais bin Ashim telah merdekakan jariah itu. Sikap sedemikian tentunya hanya lahir dari akhlak yang mulia.

